



Број/Број: **01/2а-50-1-2-60/10**

Сарајево/Sarajevo: 16.2.2010.

## ZAPISNIK

### **60. sjednice Komisije za vanjske poslove Predstavničkog doma Parlamentarne skupštine BiH, održane 16.2.2010.**

Sjednica Komisije počela je u 12 sati. Sjednici su prisustvovali: Slavko Matić, Husein Nanić, Azra Alajbegović, Lejla Klokić i Denis Bećirović.

Opravdano su odsustvovali: Azra Hadžiahmetović, Milica Marković, Milorad Živković i Sefer Halilović.

Osim članova Komisije, sjednici su prisustvovali: Sead Avdić i Momir Brajić iz Ministarstva vanjskih poslova BiH, Jusuf Halilagić i Selma Horić iz Ministarstva pravde BiH i Zoran Šainović iz Ministarstva odbrane BiH.

Sjednicom je predsjedavao Slavko Matić koji je članove Komisije upoznao s dnevnim redom 60. sjednice Komisije. Nije bilo prijedloga za izmjenu i dopunu dnevnog reda.

Članovi Komisije su za 60. sjednicu Komisije jednoglasno usvojili sljedeći

## DNEVNI RED

1. Usvajanje Zapisnika 59. sjednice Komisije;
2. Davanje mišljenja o saglasnosti za ratificiranje:
  - a) Protokola između Vijeća ministara BiH i Vlade Kraljevine Saudijske Arabije o međusobnoj zamjeni nekretnina-zemljišta za izgradnju diplomatskih predstavništava u Sarajevu i Rijadu (resorno ministarstvo: Ministarstvo vanjskih poslova BiH);
  - b) Ugovora između Bosne i Hercegovine i Republike Slovenije o pravnoj pomoći u građanskim i krivičnim stvarima (resorno ministarstvo: Ministarstvo pravde BiH);
3. Usvajanje Izvještaja o radu Komisije za vanjske poslove za 2009. godinu;
4. Orijentacioni radni plan Komisije za vanjske poslove PDPSBiH za 2010. godinu;
5. Ulazak Bosne i Hercegovine u Akcioni plan za članstvo (MAP) u NATO-u;
6. Izvještaji i materijali pristigli Komisiji:
  - a) Zaključci Vijeća Evropske unije za opće i vanjske poslove (materijal MVP-a BiH);
  - b) Pismo gosp. Embareka Abdullaha Alshameha, generalnog sekretara Narodnog kongresa Velike Socijalističke Narodne Libijske Arapske Džamahirije, upućeno gosp. Miloradu Živkoviću, predsjedavajućem Predstavničkog doma;
  - c) Posjeta predsjedavajućeg Predsjedništva BiH Berlinu, Izvještaj (materijal MVP-a BiH);

- d) Sastanak Vijeća za vanjske poslove, Brisel, 25.1.2010., Zaključci Vijeća o BiH: Operacija ALTHEA (EUFOR), (materijal MVP-a BiH);
- e) VIJEĆE EVROPE (VE) – Izlaganje predsjedavajuće Odbora ministara Vijeća Evrope Micheline Calmy-Rey, informacija i govor (materijal MVP-a BiH);
- f) Zaključci sa Samita Evropske unije (10. i 11. decembar 2009.), (materijal MVP-a BiH);
- g) Svečana izjava gosp. Štefana Fulea, imenovanog komesara za proširenje i politiku evropskog susjedstva;
- h) Posjeta Delegacije PSBiH u Interparlamentarnoj uniji Narodnoj skupštini Republike Srbije;

Tekuća pitanja;

### **Ad. 1. Usvajanje Zapisnika 59. sjednice Komisije za vanjske poslove**

Sead Avdić predložio je da se iz Zapisnika izbacij jedan njegov navod kazavši da se van konteksta može pogrešno tumačiti.

Azra Alajbegović je također imala primjedbu jer u Zapisniku nije navedeno kada je postavila pitanje Denisu Bećiroviću vezano za zaključak Komisije na prošloj sjednici.

Zapisnik 59. sjednice usvojen je jednoglasno, uz primjedbe Seada Avdića i Azre Alajbegović.

### **Ad. 2. a) Davanje mišljenja o saglasnosti za ratificiranje Protokola između Vijeća ministara BiH i Vlade Kraljevine Saudijske Arabije o međusobnoj zamjeni nekretnina-zemljišta za izgradnju diplomatskih predstavništava u Sarajevu i Rijadu**

Sead Avdić je ukratko kazao da se radi o Protokolu o zamjeni nekretnina između Bosne i Hercegovine i Saudijske Arabije, o obostranom ustupanju zemljišta za izgradnju ambasada poštujući zakone dvije zemlje. Protokol su potpisala dva ministra vanjskih poslova i ispunjeni su svi uslovi da Predstavnički dom da saglasnost za ratifikaciju.

Nije bilo pitanja i Komisija je jednoglasno dala pozitivno mišljenje Predstavničkom domu u vezi s ratifikacijom ovog protokola.

### **Ad. 2. b) Davanje mišljenja o saglasnosti za ratificiranje Ugovora između Bosne i Hercegovine i Republike Slovenije o pravnoj pomoći u građanskim i krivičnim stvarima**

Jusuf Halilagić iz Ministarstva pravde BiH kazao je da su predstavnici BiH krajem 2002. godine potpisali ovaj ugovor, ali da je u međuvremenu Slovenija ušla u Evropsku uniju i izgubila legitimitet za zaključenje takvih ugovora u građanskim stvarima te je odbila davanje saglasnosti za zastupanje advokata iz Bosne i Hercegovine u Sloveniji. Zbog toga je pokrenuta procedura za izmjenu odredbe u članu 3. Radi se o istom ugovoru iz 2002. godine, osim tog dijela o zastupanju advokata iz BiH u Sloveniji i obrnuto i nakon ponovnih pregovora, 24.3. 2009., ministri pravde obje države potpisali su ugovor.

Nije bilo rasprave i članovi Komisije jednoglasno su dali pozitivno mišljenje Predstavničkom domu u vezi s ratifikacijom Ugovora između Bosne i Hercegovine i Republike Slovenije o pravnoj pomoći u građanskim i krivičnim stvarima.

### **Ad. 3. Usvajanje Izvještaja o radu Komisije za vanjske poslove za 2009. godinu**

Nije bilo primjedbi i članovi Komisije jednoglasno su usvojili Izvještaj o radu Komisije za vanjske poslove za 2009. godinu.

### **Ad. 4. Orijentacioni radni plan Komisije za vanjske poslove PDPSBiH za 2010. godinu**

Predsjedavajući Komisije Slavko Matić pozvao je sekretara Komisije da prije rasprave kratko iznese uvodne napomene.

Sekretar Komisije Merdžana Iglica kazala je da posao Komisije za vanjske poslove u velikoj mjeri zavisi od uvrštavanja u dnevni red sjednica Predstavničkog doma međunarodnih sporazuma i ugovora, te da Komisija u potpunosti slijedi tu dinamiku i u tom smislu nema nikakvih problema. Što se ostalih aktivnosti tiče, u Orijentacioni radni plan Komisije uneseni su zakoni – kao što je Zakon o zaključivanju međunarodnih ugovora i sporazuma jer je Ministarstvo ranije dalo ovaj zakon u proceduru, ali da je povučen. Također se očekuje da u proceduru bude dostavljen Zakon o vanjskim poslovima. Dalje je sekretar Komisije kazala da zasad nema nikakvih otvorenih bilateralnih poziva komisijama drugih zemalja, a Radnim planom obuhvaćeno je sve što je za sada izvjesno.

Predsjedavajući Komisije Slavko Matić otvorio je raspravu o Orijentacionom radnom planu.

Husein Nanić rekao je da je u Programu sadržano praćenje rada Vijeća ministara BiH i Predsjedništva BiH iz naše nadležnosti i da je to standardni okvir. Međutim, navedene su aktivnosti i za period od oktobra do decembra, a s obzirom da je ovo izborna godina, taj period bit će miran što se tiče rada Komisije. Postavio je pitanje za dio koji se odnosi na međunarodnu saradnju Komisije, gdje stoji da postoje četiri poziva Komisiji, pa je zatražio razjašnjenje s obzirom na ovo što je sekretar Komisije prethodno kazala. Pitao je da li zaista postoje pozivi od Komisije i Komisiji.

Sekretar Komisije odgovorila je da se radi o ranije upućenim pozivima. Poziv od Kraljevine Maroko upućen je još 2007.godine. To je, u principu, poziv Parlamentu, gdje bi bila uključena i Komisija. Isto je tako i s Republikom Iran – i taj poziv stoji dvije-tri godine. Što se tiče Kraljevine Španije, poziv je iz 2007. godine, ali nije kasnije bilo poticaja za to. Kazala je da je postavljala pitanje MVP-u, ali da nije dobila odgovor. Također je stara stvar i u vezi s međuparlamentarnom saradnjom, s tim što su to sada preuzele grupe prijateljstva, tako da se sada tu nadležnosti prepliću, kazala je Merdžana Iglica, sekretar Komisije.

Husein Nanić rekao je da te stvari ne treba da stoje neriješene, da se tačno razjasni da li ima poziva ili nema, da li ih stavljati u plan ili ne, te da tu stvar treba dovesti do kraja. Preuzimanje nekih aktivnosti od međuparlamentarnih grupa prijateljstva, prilika je da se kaže da mnoge stvari – ono što piše u Poslovniku, ne bi trebalo da preuzimaju nikakve grupe ono što pripada Komisiji. Naveo je primjere posjete članova Američkog senata, posjeta Delegacije Evropskog parlamenta i neke druge posjete ovih dana, a Komisija za vanjske poslove nema nikakvog doticaja s tim. Naglasio je da misli da Komisija za vanjske poslove treba biti uključena, ako ništa drugo da članovi Komisije prisustvuju tome. Iznio je mišljenje da te delegacije prvenstveno treba da imaju susret s Komisijom za vanjske poslove. Izrazio je protest što ni priča o bezviznom režimu nema doticaja s Komisijom za vanjske poslove. Isto tako u vezi s prijemom u NATO – nadležna je ova komisija, ili bar da bude informirana ili da bude uključena u to. Čini se da je ova komisija u potpunoj defanzivi i zatražio da se te stvari

uozbilje. Da se tačno zna koji su to pozivi Komisiji, a ako nema novca, neka to Kolegij kaže. A u današnjoj situaciji kada je BiH potreban pozitivan imidž u međunarodnoj zajednici, mi smo u potpunoj defanzivi. Odnos prema ovim pitanjima treba promijeniti, naglasio je Husein Nanić.

Azra Alajbegović kazala je da se slaže sa svim ovim što je rekao Husein Nanić, da ima takav stav i da neće ponavljati. Kazala je da je sticajem okolnosti bila domaćin delegaciji Irana i da je zamjenjivala predsjedavajućeg. To je bila mješovita delegacija u kojoj su bili i članovi Komisije za vanjske poslove. Tom prilikom jedan dan bila je domaćin Komisija za vanjske poslove, a drugi dan međuparlamentarna grupa prijateljstva. Naglasila je da se treba raditi na tješnjoj saradnji s grupama prijateljstva vezano za određene zemlje. A s druge strane, treba Kolegiju Doma uputiti konkretan plan vezan za mogućnost ostvarenja bar jedne od posjeta tokom 2010. godine gdje imamo poziv, kako bi na neki način utrljali put Komisiji u narednom sazivu. Apsolutno je neprimjereno da članovi Komisije za vanjske poslove ne dobiju poziv kad je u pitanju obraćanje bilo koje delegacije ili zvaničnika iz Evrope, kazala je, uz ostalo, Azra Alajbegović.

Sekretar Komisije Merdžana Iglica odgovorila je na pitanja Huseina Nanića i Azre Alajbegović. Kazala je da je u potpunosti saglasna s njihovim mišljenjem u pogledu navedenih pitanja. Navela je da, kada su u pitanju grupe prijateljstva, u ranijim mandatima nije bilo tih grupa, te da su tek u ovom mandatu formirane i da su one zaista preuzele neke nadležnosti. To je pitanje unutrašnje organizacije. Sve te grupe imaju sekretare, i kad dolazi delegacija iz Irana – dolazi u svojstvu grupa prijateljstva i mi se onda iz toga isključujemo – domaćin je grupa prijateljstva i tu dolazi do preplitanja nadležnosti. Dodala je da ona tu nema mogućnosti da bilo šta uradi. Što se tiče ovih poziva koji su navedeni u Planu, kazala je da bi voljela da se to završi i da će ona insistirati da se razjasne stvari u vezi s pozivima Komisiji koji stoje. U vezi s 12.interparlamentarnim sastankom, kazala je da se taj sastanak jednom održava u Sarajevu, jednom u Briselu. Njemu treba da prisustvuju članovi Komisije za evropske integracije a oni nas nisu pozvali.

Azra Alajbegović zatražila je da joj se dostavi poslovnik o radu grupa prijateljstva, da se to uvrsti u dnevni red Komisije na jednu od narednih sjednica i da se vidi šta se na tome može uraditi.

Denis Bećirović saglasio se s članovima Komisije koji su stekli dojam da je aktivnost Komisije marginalizirana. Za primjer je naveo da je na posljednjoj sjednici Komisija uputila zaključak Kolegiju da se određeno pitanje uvrsti u dnevni red sjednice Doma, a da to nije ni uvršteno niti je Kolegij odgovorio Komisiji zašto to nije uvršteno. Evidentna je činjenica da nema komunikacije s brojnim delegacijama Evropske unije koje dolaze u BiH. Čak ni u onim slučajevima u kojima bi Komisija za vanjske poslove trebalo da preuzme glavnu ulogu članovi Komisije se ne pozivaju. Dodao je da bi se moglo postaviti pitanje – da li je Komisija izgubila autoritet ili se nije dovoljno afirmirala u dosadašnjem radu ili je problem do Kolegija Doma. Bez obzira gdje je problem, rekao je da smatra da ne bi trebalo ostati samo na diskusiji već bi trebalo usvojiti poseban zaključak. Predložio je **da Komisija izrazi protest prema Kolegiju Predstavničkog doma zbog konstantnog marginaliziranja rada i statusa Komisije za vanjske poslove PDPSBiH. I drugi zaključak – da Komisija zvanično zatraži obrazloženje zašto zaključak Komisije nije ispoštovan a odnosi se na diplomatska predstavništva Republike Srpske u inozemstvu.**

Predsjedavajući Slavko Matić rekao je da misli da se u dobroj mjeri udaljilo od tačke dnevnog reda, iako bi se u nekom širem smislu to moglo podvesti pod raspravu o Orijentacionom radnom planu Komisije za 2010. godinu. Dodao je da je Husein Nanić konkretno skrenuo pažnju na pozive, koji se odnose, prije svega, na uzvratnu posjetu članova Parlamentarne skupštine BiH, a u okviru delegacije Parlamentarne skupštine BiH i dio koji se odnosi na zastupljenost Komisije za vanjske poslove, što znači da je sasvim drugačija situacija od one koja je bila prošle godine kada je Komisija za vanjske poslove Švicarske ili Estonskog parlamenta pozivala direktno Komisiju. Kad je u pitanju Španija, Maroko i Iran, tu se radi o uzvratnoj posjeti Parlamenta, pa stoga o tome ne može odlučivati sama Komisija, već Kolegij Doma. Predsjedavajući Matić rekao je da će se suzdržati od komentiranja dijela diskusija koje se odnose na mjesto Komisije, ali se mora nešto primijetiti: da je Komisija prve godine krenula ofanzivno kako se predlaže, ona bi u ovom sastavu svoj rad završila već u prvoj godini. Dodao je da bi volio da oni zaključci s prošle sjednice ne budu kraj učešća Milorada Živkovića i Milice Marković u Komisiji, a nije siguran da neće. Tako se to desilo prve godine. Mora se biti svjesno da Komisija nije tijelo u kojem moramo svi imati isto mišljenje. Sve se tu poziva na Komisiju, a ne razmišlja se da o svakom tom pitanju, u pravilu, imamo različito mišljenje. Bilo je nas troje u Moskvi i sve troje imali smo različita mišljenja. Takav je odraz prilika koje vladaju ovdje, povjerenja i nepovjerenja, rekao je, uz ostalo, predsjedavajući Matić.

Predsjedavajući Matić rekao je da će staviti na glasanje zaključke koje je predložio Denis Bećirović, ali da ne vidi da oni nešto doprinose.

Denis Bećirović obrazložio je zaključke koje je predložio, dodavši da je većina članova podržala to što je on govorio, pa da bi stoga trebalo usvojiti te zaključke. U vezi s mišljenjem koje je iznio predsjedavajući, rekao je da su sve odluke i zaključci na Komisiji doneseni u skladu s Poslovníkom i da to što postoje različita mišljenja nije problem. Dodao je da je i Parlament sastavljen od različitih stranaka, pa se tako iznose i različita mišljenja. Da li će se neko odazvati radu ove komisije, ne bi trebalo da utiče na rad Komisije i to ne zavisi od Komisije, rekao je, uz ostalo, Denis Bećirović.

Husein Nanić rekao je da želi dati komentar na mišljenje koje je iznio predsjedavajući. Rekao je da se slaže s Bećirovićem, da je Komisija radila u skladu s Poslovníkom i da vjeruje da su svi članovi Komisije jednako dobili poziv za sjednicu Komisije. Zašto neko hoće ili neće da dođe, zašto neko ima drugačije mišljenje od njegovog, to ga ne interesira. Naglasio je da on želi dati doprinos Bosni i Hercegovini u promociji svega onoga što je u vezi s vanjskom politikom. Rekao je da ne želi sistemom ucjena uvesti neki drugi metod rada u Komisiji. Komisija je u vezi s predstavništvima Republike Srpske donijela zaključak u skladu s Poslovníkom i dostavila ga Kolegiju, a kako će se Kolegij o tome odlučiti, hoće li biti u dnevnom redu, kako će teći rasprava, u to se ne bi trebalo ulaziti, rekao je, uz ostalo, Husein Nanić. Dodao je da treba vidjeti jesu li odsutni članovi Komisije opravdali ili ne izostanak sa sjednice. Predložio je da se izjasni o zaključcima koje je predložio Bećirović, jer oni proizilaze iz diskusije u okviru ove tačke dnevnog reda.

Azra Alajbegović obavijestila je da je u 12 sati, kad je sazvana i ova komisija, sazvana i Grupa za populaciju kojom predsjedava Milorad Živković, ta je sjednica sazvana ranije, te da misli da ima puno problema u koordinaciji unutar grupa i komisija, kako se ne bi sazivale sjednice u isto vrijeme.

Predsjedavajući Matić rekao je da nije tvrdio da li će neko dolaziti ili neće, ali da ne bi volio da se to dogodi. Rekao je da mu je želja da kako-tako ovaj mandat u ovom sastavu ne samo Parlamenta nego i ove komisije privedemo kraju. Dodao je da, kad bi mogao da bira, nikada ne bi bio ni član a kamoli predsjedavajući ovakve komisije, jer dok su ovakvi odnosi u BiH, ništa se kreativno ni korisno ne može uraditi.

Predsjedavajući je pozvao članove Komisije na izjašnjavaње, prije svega o Orijentacionom radnom planu, a onda i o zaključcima.

Prvo je na glasanje dao Orijentacioni radni plan Komisije za 2010. godinu.

Orijentacioni radni plan usvojen je jednoglasno.

Husein Nanić je poslije glasanja rekao da on nije u raspravi predložio konkretan zaključak kad je diskutirao o pozivima koji stoje u Orijentacionom radnom planu, pa je pitao da li je potrebno da se donese zaključak da se zaduži rukovodstvo Komisije da se to provjeri, da li postoje pozivi i da li se planira realizacija posjeta. Predložio je konkretan zaključak:

**Zadužuje se rukovodstvo Komisije za vanjske poslove da analizira dobivene pozive za posjete i da u kontaktu s Kolegijom definitivno dobijemo odluku da li su te posjete izvodive i da li je moguća njihova realizacija u ovoj godini.**

Predsjedavajući je stavio ovaj zaključak na glasanje i konstatirao da je usvojen jednoglasno.

Dalje je predsjedavajući na glasanje dao zaključke koje je predložio Denis Bećirović.

Denis Bećirović iznio je formulaciju zaključaka:

- 1. Komisija za vanjske poslove PDPSBiH izražava protest zbog marginalizacije Komisije za vanjske poslove u vanjskopolitičkim aktivnostima Parlamentarne skupštine BiH.**
- 2. Komisija za vanjske poslove traži informaciju od Kolegija Predstavničkog doma zbog čega na dnevni red 72. sjednice Predstavničkog doma nije stavljena predložena tačka: „Odgovor Ministarstva vanjskih poslova BiH na Zaključak Komisije za vanjske poslove Predstavničkog doma povodom otvaranja predstavništava Republike Srpske u inozemstvu“.**

Članovi Komisije su se o zaključcima pojedinačno izjašnjavali.

Predsjedavajući Matić je, poslije glasanja, konstatirao da je prvi zaključak usvojen s tri glasa „za“ i dva „protiv“, a drugi zaključak usvojen je s četiri glasa „za“ i jednim „suzdržanim“.

## **Ad. 5. Ulazak Bosne i Hercegovine u Akcioni plan za članstvo (MAP) u NATO-u**

Predsjedavajući je rekao da su prisutni predstavnici Ministarstva odbrane BiH i Ministarstva vanjskih poslova BiH i pozvao ih da ukratko podnesu obrazloženje.

U ime MVPBiH govorio je Momir Brajić, šef Odsjeka za NATO. Rekao je da se ulazak BiH u NATO nalazi u vrhu liste prioriteta vanjske politike Bosne i Hercegovine, koju je utvrdilo Predsjedništvo BiH. Rekao je da je tokom protekle godine uloženi značajni napor da bi podnijeli aplikaciju za Akcioni plan za članstvo, što se smatra kandidatskim statusom za ulazak BiH u članstvo. Rekao je da su dolazili pozitivni signali i da su u stalnoj komunikaciji s našom misijom i sa svim članicama NATO-a. Pratilo se i šta rade ostale zemlje u okruženju gdje smo imali nekoliko bilateralnih sastanaka i vidjeli da čak i Srbija koja je proglasila vojnu neutralnost šalje jasne signale da žele da postanu punopravna članica NATO-a. Sve nas je to motiviralo da predložimo Predsjedništvu BiH da zvanično apliciramo za MAP. Rekao je da je očekivan pozitivan odgovor, ali, da je, nažalost, naša unutrašnja situacija poslala negativnu sliku, iako je naše kretanje ka NATO-u ocjenjivano vrlo pozitivno. Rekao je da su nekako između redova poslani signali da se od nas očekuje, prije svega, sporazum o prijenosu vlasništva nad pokretnom i nepokretnom vojnom imovinom i napredak u procesu promjene Ustava BiH. Rekao je da se od decembra prošle godine do danas ništa pozitivno nije promijenilo na unutrašnjem planu, da je danas održan sastanak sa sedam-osam ambasadora iz Brisela. Poruka je ostala ista – da BiH mora napraviti nekakav napredak da bi se dobilo zeleno svjetlo. Dodao je da ni zemlje članice NATO-a nemaju konsenzus između sebe, traže napredak u vezi s pokretnom i nepokretnom vojnom imovinom, traže međuregionalnu saradnju, pomak s ciljem promjene Ustava. Naglasio je da ne zna kako će se stvari dalje odvijati, ali da oni očekuju u naredna dva tri mjeseca pozitivne signale iz BiH. Naglasio je da BiH ima podršku SAD-a, te da se sa samo malo takta i mudrosti ovo može pokrenuti u pozitivnom smjeru i da možemo dobiti kandidatski status, što je vrlo značajano za BiH, rekao je predstavnik MVP.

Denis Bećirović postavio pitao je šta je svrha ove tačke dnevnog reda na sjednici Komisije, kad čuje uvodno izlaganje – je li samo da primimo k znanju ili da predložimo i konkretne zaključke vezane za ovu tačku.

Slavko Matić rekao je da misli da je to bio cilj predlagača ove tačke Huseina Nanića – da idemo prema Predstavničkom domu, a iz same rasprave proizaći će potreba za zaključcima.

Husein Nanić je, cijeneći situaciju u vezi s prijemom u NATO, zatražio da Komisija dobije informaciju o tome šta se dešava i da eventualno predložimo određene zaključke koji bi možda mogli stvari ubrzati i uozbiljiti, da vidimo da li Parlament može imati ulogu da se to sve malo ubrza. Rekao je da je važno procijeniti da li je potrebno da se i u dnevni red sjednice Predstavničkog doma uvrsti ta tačka, da li je to zrelo da se nađe na dnevnom redu. Rekao je da treba da čujemo i procjenu Ministarstva odbrane BiH, pa da vidimo da li je zrelo da ide kao tačka dnevnog reda na sjednicu Parlamenta.

Predsjedavajući je dao riječ predstavniku Ministarstva odbrane BiH.

U ime Ministarstva odbrane BiH govorio je Zoran Šainović, pomoćnik ministra odbrane BiH. U vezi s MAP procesom, on je kazao da se tu radi o logičnom koraku ka punopravnom članstvu nakon što BiH učestvuje u nizu elemenata programa Partnerstvo za mir. Članstvo u MAP-u je neophodan korak u procesu integracija u punopravno članstvo, ali korak koji ne pruža garancije za konačno članstvo. BiH jeste aplicirala za taj proces, i u skladu sa zaključkom ministara vanjskih poslova iz decembra prošle godine, ta aplikacija nije odobrena. Međutim, u poruci iz kominikea na neki način je ohrabren daljnji proces, odnosno ispunjenje uslova. Ti uslovi nikad nisu navedeni kao lista zahtjeva. Govori se o članstvu u MAP-u kao političkoj odluci koja je utemeljena na izvedbi kandidata i na percepciji kako nas NATO vidi. Nažalost, ta percepcija u očima NATO-a nije dobra. Čak i uz pretpostavku da većinu tih zahtjeva, koji se često spominju kao kriterij, mi jesmo ispunili. U ovom trenutku govori se o zahtjevu o kojima je govorio kolega Brajić. Mi u Ministarstvu odbrane trudimo se da povećamo naše učešće u operacijama podrške miru i cijenim da ovdje dobro stojimo. Mi treba da pokažemo da nećemo biti teret NATO-u nego kredibilan član. Integracija BiH u NATO je zakonska obaveza svih institucija, tako da je rasprava o toj temi dobrodošla na osnovu ovih sistematiziranih tema, rekao je, uz ostalo, predstavnik Ministarstva odbrane BiH.

Denis Bećirović rekao je da ima četiri zaključka koja će predložiti u vezi s ovom tačkom dnevnog reda, ali je zatražio objašnjenje o dva pitanja – prvo, o signalima Srbije za članstvo u NATO-u, koji su to signali, i drugo pitanje kako u NATO-u gledaju o sve češćim idejama u Republici Srpskoj da se ovo čisto državno pitanje ulaska BiH u NATO svodi na entitetsko pitanje, pa se čak nagovještava i mogućnost referenduma u jednom entitetu, a ne u državi BiH.

Momir Brajić je na prvo pitanje odgovorio da je on bio na sastanku u jednoj delegaciji u MVP-u i da su oni rekli da to još ne mogu plasirati javno kao ideju, ali da je sve spremno i da je to sasvim sigurno da oni imaju namjeru ići ka NATO-u.

Zoran Šainović je u vezi s ovim kazao da je Srbija krajem prošle godine uspostavila misiju pri NATO-u, a prije toga je imala samo ured za vezu koji je bio na nivou otpravnika poslova dok sada imaju ambasadora. Niz je i drugih pokazatelja u pogledu primjene NATO doktrina, standarda u opremanju, obuci oružanih snaga, tako da se može govoriti o vidljivim i konkretnim pokazateljima kada je u pitanju odnos Srbije prema NATO-a.

U vezi s drugim pitanjem, Zoran Šainović kazao je da mu je teško komentirati šta je pozicija NATO-a i kako gleda konkretno na to pitanje. Ali ono što je sigurno i što možemo naći u literaturi, abecedi kandidature, jeste da država kandidat mora demonstrirati unutrašnje jedinstvo i da pitanje integracije u NATO mora biti produkt najšireg konsenzusa svih relevantnih političkih snaga u zemlji.

Husein Nanić pitao je da li bilo koje ministarstvo ili Vijeće ministara BiH ima obavezu dostavljati Parlamentarnoj skupštini BiH informaciju u nekom vremenskom periodu o pitanjima približavanja BiH NATO-u i sl.

Zoran Šainović rekao je da postoji NATO koordinacijski tim pri Vijeću ministara BiH koji čine predstavnici svih ministarstava u Vijeću ministara BiH, Obavještajno-sigurnosne



agencije, predstavnik Direkcije za evropske integracije i u novom sazivu imat ćemo i predstavnike Uprave za indirektno oporezivanje – Ureda za ekonomsko planiranje. To je interesorna grupa kojom predsjedava Ana Trišić Babić, zamjenica ministra vanjskih poslova, u kojoj je gosp. Šainović zamjenik predsjednika tog koordinacijskog tima. On je kazao da taj tim ima obavezu i redovno dostavlja šestomjesečne izvještaje o radu NATO koordinacijskog tima, čije polje djelovanja su sva pitanja vezana za NATO integracije. U tim izvještajima navodi se uglavnom šta jeste bilo polje djelovanja, rezultati, očekivanja i plan rada za neki budući period. Mi smo završili procjenu i to je procjena provođenja individualnog partnerskog akcionog plana koji tretira period 2008.-2009. i dio 2010. godine. Mi smo završili samo procjenu koja će biti predmet analize eksperata NATO-a naredne sedmice. Potom će ta procjena biti dostavljena Vijeću ministara BiH i Parlamentarnoj skupštini BiH. U toj procjeni identificirane su oblasti u kojima zaostajemo – to je pitanje ustavnih reformi, daljnji nastavak reforme policije, konkretne reforme u oblasti pravosuđa, neriješeno pitanje vojne imovine. Zbog 5% aktivnosti koje nisu realizirane, što je paradoks, ne vidi se da je 95% planskih aktivnosti realizirano, kompletna realizacija obaveza iz viznog režima, čitav niz podzakonskih akata u domenu rada državne granične policije, Ministarstva sigurnosti BiH, Ministarstva odbrane BiH. Sve se svodi na ovih nekoliko ključnih pitanja koja na kraju postanu odlučujuća u procesu naše procjene statusa kandidata za MAP-u rekao je, uz ostalo, predstavnik Ministarstva odbrane BiH.

Husein Nanić pitao je da li se desilo nekad do sada da je Parlamentarna skupština BiH razmatrala taj proces.

Zoran Šainović kazao je da je u više navrata o ovim pitanjima raspravljala Zajednička komisija za odbranu i sigurnost BiH. Ali ne bi trebalo govoriti o podijeljenoj odgovornosti. I ova komisija ima ključnu ulogu u ovim pitanjima, kada je u pitanju usmjeravanje procesa, traženje ubrzanja procesa i odgovornosti od drugih da se stvari provode itd.

Sead Avdić rekao je da želi dati nekoliko sugestija. Dva kratkoročna cilja vanjske politike u narednih šest mjeseci jesu – liberalizacija viznog režima i ulazak u MAP. U aprilu mjesecu ponovo se ima šansa za preispitivanje stava NATO-a u smislu prihvatanja akcionog plana za članstvo u NATO-u. Ako se dotad nešto učini, to je moguće. Mi smo uglavnom tehnička pitanja završili, ali ostaju politička pitanja. Maksimalan napor treba učiniti da bi se provela presuda Evropskog suda za ljudska prava i ustavne promjene, da bi izbori bili validni. Objektivno, politička ofanziva mora biti prisutna. Španija je predsjedavajuća i bit će ključna zemlja koja utiče na ovaj proces. Neophodno je izvršiti lobiranje i animiranje da bi se u aprilu ovo stavilo na dnevni red. Za ovu komisiju ima posla, da zajedno s Komisijom za odbranu i sigurnost, uz NATO koordinacijski tim, do aprila pokuša učiniti nešto u smislu političkih pitanja. On je predložio da se jedna sjednica Komisije u narednom periodu posveti samo ovom pitanju, kako Komisija za vanjske poslove može pomoći BiH, u smislu butmirskog procesa itd. Ovaj cilj mora imati podršku svih političkih stranaka i svih faktora u BiH.

Denis Bećirović predložio je Komisiji sljedeće zaključke, na bazi rasprave i materijala koji smo dobili.

1. Komisija za vanjske poslove PDPSBiH smatra da je priključenje Bosne i Hercegovine NATO-u jedan od strateških ciljeva države Bosne i Hercegovine koji nema alternative.
2. Komisija za vanjske poslove PDPSBiH podržava stavove generalnog sekretara NATO -a u kojima se traži ubrzanje napretka u političkim reformama: reformi Ustava i u kreiranju jedne jedinstvene vlade koja je u stanju donositi teške odluke i provoditi neophodne reforme.
3. Komisija za vanjske poslove PDPSBiH smatra politički štetnim nastojanje pojedinih političkih krugova u entitetima koji nastoje da se o ovom važnom državnom pitanju (uključivanje BiH u NATO) odlučuje na nivou entiteta.
4. Komisija za vanjske poslove predlaže Kolegiju Predstavničkog doma da u dnevni red naredne, 73. sjednice Predstavničkog doma uvrsti tačku dnevnog reda: Ulazak BiH u akcioni plan za članstvo (MAP) u NATO.

Nakon predlaganja zaključaka Bećirović se zahvalio Naniću što je inicirao ovu tačku i kazao da je ova rasprava bila veoma korisna.

Slavko Matić primijetio je da su svojevremeno Bugarska i Rumunija, za nagradu što su postale članice NATO, dobile članstvo u Evropskoj uniji. Rekao je da ne zna da li je to put koji treba da slijedi i BiH. On se ogradio i rekao da ne podržava nikakva nastojanja u Republici Srpskoj da se eventualno raspisuje referendum na nivou entiteta o ulasku u NATO. Bugarska i Rumunija imale su velike upitnike za ulazak u NATO i dobile su mogućnost da bez ikakvih kriterija uđu u Evropsku uniju i danas nemaju ni izbliza iste kriterije kao Republika Hrvatska, ali su članice Evropske unije već tri godine. Ovdje su malo čudne stvari, BiH se ipak na neki način ucjenjuje. Reforma Ustava ne može se obaviti za tri mjeseca, za to trebaju možda i tri godine. Ali nije greška samo do njih, najveća je do nas jer za reformu Ustava smo znali i 2006. godine, imali smo i aprilski paket, mogli smo na tom planu nešto činiti. Sad se to želi iskoristiti i proturiti na mala vrata za ove izbore. U našim okolnostima ja nisam optimista da možemo čak i to uraditi. Iako su se te promjene i bez odluke Evropskog suda za ljudska prava mogle desiti, ne znam ni jednu političku stranku koja je bila protiv toga, ali neka o tome Parlament raspravlja, kazao je, između ostalog, Slavko Matić.

Denis Bećirović želio je iznijeti komentar – da je NATO vojni savez i da geostrateški položaj Bugarske i Rumunije nije isti kao položaj BiH, pa da stoga ne možemo to upoređivati.

Husein Nanić je na kraju dodao da je njegova težnja kad je predlagao ovu tačku dnevnog reda bila da se dobiju informacije, da mi kao komisija sagledamo stvari i da vidimo šta se može napraviti da se ove stvari pokrenu. Rekao je da imamo situaciju da lideri političkih stranaka u mnogo čemu kočuju razvoj BiH, a da smo mi članovi Parlamentarne skupštine BiH i da kroz institucije treba te stvari da postavimo na mjesto koje im pripada i da preuzmemo svoju ulogu koju imamo. Znači, da Parlamentarna skupština BiH da svoj doprinos u ovom zadatku. U vezi sa zaključcima, kad sam sve ovo saslušao i čitao, a nisam siguran da je sa svih aspekata sagledana situacija, i da bi bilo dobro da zatražimo dodatne informacije. Ovo se može smatrati čak i internom informacijom i možda nije dobro da kao ovakva ide na Parlament. Možda bi bilo dobro dobiti sveobuhvatnu informaciju od Koordinacijskog tima i da se takva

informacija dostavi Parlamentarnoj skupštini BiH, jer ova nije dovoljna. U tom smislu predložio je zaključak da se traži od NATO koordinacijskog tima da dostavi sveobuhvatnu informaciju o stanju u približavanju BiH NATO-u.

Zoran Šainović objasnio je da je NATO koordinacijski tim jedna komisija, organ Vijeća ministara BiH, tijelo internog karaktera, pa je predložio da se relevantna informacija zatraži od Vijeća ministara BiH, a Vijeće ministara BiH zadužit će ovaj tim.

Husein Nanić saglasio se s tim pa je predložio da se od Vijeća ministara BiH zatraži ta informacija.

Predsjedavajući Matić rekao je da bi to, po njemu, onda bila izmjena 4. zaključka Denisa Bećirovića i pitao ga da li je saglasan s ovim zaključkom.

Denis Bećirović rekao je da nema ništa protiv, ali da će se onda izgubiti više vremena, ali ako je to prijedlog predlagača tačke dnevnog reda, saglasan je da se to modificira.

Husein Nanić rekao je da se postavi rok od 30 dana.

Denis Bećirović rekao je da bi bilo dobro, s obzirom na to da ističe ovaj mandat, da se predloži Kolegiju da se ipak ovaj materijal uvrsti u dnevni red kako bi Parlamentarna skupština BiH zauzela stav, a onda treba zadužiti Vijeće ministara BiH. Rekao je da bi ovo bila duža procedura.

Husein Nanić izrazio je bojazan da će se otvoriti rasprava o tome zašto baš ovaj materijal, pa opet ne bi postigli cilj.

Predsjedavajući Matić sugerirao je da se ipak ide samo s ovim četvrtim zaključkom – da samo taj zaključak predložimo Kolegiju, a onda se kroz raspravu u Predstavničkom domu mogu iznijeti i ovakvi zaključci.

Denis Bećirović rekao je da nakon ovolike rasprave ne bi bilo fer ići samo s konstatacijom da je ulazak BiH u NATO strateško pitanje, ali da neće insistirati do kraja, da će se saglasiti ako je takva procjena većine.

Husein Nanić insistirao je na dobivanju cjelokupne informacije koja bi mogla stići do polovine marta i početkom aprila bila bi na dnevnom redu.

Azra Alajbegović saglasila se s prijedlogom predsjedavajućeg Matića, rekavši da bi ovo bilo najoperativnije i da bi tako najbrže došli do tačke dnevnog reda na sjednici Predstavničkog doma što nam je cilj.

Slavko Matić je, nakon rasprave, predložio sljedeći zaključak:

1. Komisija za vanjske poslove Predstavničkog doma, razmatrajući ulazak BiH u NATO kao strateški vanjskopolitički cilj Bosne i Hercegovine, kroz informaciju koja nam je dostavljena, predlaže Predstavničkom domu da se u dnevni red sjednice u što skorije

vrijeme uvrsti cjelovita informacija Vijeća ministara BiH o trenutnom stanju i aktivnostima na putu ka članstvu kroz MAP, odnosno našem cilju uključenja u NATO.

Denis Bećirović predložio je da se u zaključku postave rokovi i Vijeću ministara BiH i Kolegiju.

Azra Alajbegović predložila je da se u dnevni red sjednice, koja treba da bude održana 10. 3.2010., ovo uvrsti kao tačka dnevnog reda.

Predsjedavajući Matić kazao je da se Vijeću ministara BiH može dati rok od 15 dana, a da bi trebalo zahtijevati da se to uvrsti u dnevni red sjednice čije je održavanje planirano 10. 3. 2010.

Nakon dodatnih konsultacija, usaglašen je sljedeći zaključak:

- 1. Komisija za vanjske poslove, posmatrajući ulazak Bosne i Hercegovine u NATO kao strateški vanjskopolitički cilj BiH, predlaže Predstavničkom domu da od Vijeća ministara BiH zatraži da u roku od 15 dana dostavi cjelovitu informaciju o trenutnom stanju i aktivnostima na putu ka punopravnom članstvu BiH u NATO-u, te da je po njenom prijemu uvrsti u dnevni red 73. sjednice Predstavničkog doma, zakazane za 10.3.2010.**

Ovaj zaključak usvojen je jednoglasno.

#### **Ad. 6. Izvještaji i materijali pristigli Komisiji:**

- a) Zaključci Vijeća Evropske unije za opće i vanjske poslove (materijal MVP-a BiH);**
- b) Pismo gosp. Embareka Abdullaha Alsahameha, generalnog sekretara Narodnog kongresa Velike Socijalističke Narodne Libijske Arapske Džamahirije upućeno gosp. Miloradu Živkoviću, predsjedavajućem Predstavničkog doma;**
- c) Posjeta predsjedavajućeg Predsjedništva BiH Berlinu, izvještaj (materijal MVP-a BiH);**
- d) Sastanak Vijeća za vanjske poslove, Brisel, 25.1.2010., Zaključci Vijeća o BiH: Operacija ALTHEA (EUFOR), (materijal MVP-a BiH);**
- e) VIJEĆE EVROPE (VE) – Izlaganje predsjedavajuće Odbora ministara Vijeća Evrope Micheline Calmy-Rey, informacija i govor (materijal MVP-a BiH);**
- f) Zaključci sa Samita Evropske unije (10. i 11. decembar 2009.), (materijal MVP-a BiH);**
- g) Svečana izjava gosp. Štefana Fulfea, imenovanog komesara za proširenje i politiku evropskog susjedstva;**
- h) Posjeta Delegacije PSBiH u Interparlamentarnoj uniji Narodnoj skupštini Republike Srbije;**

Predsjedavajući je otvorio raspravu i pitao ima li neko nešto posebno o čemu bi se raspravljalo. Ako nema, da se svi ovi akti prime k znanju.

Vežano za podtačke a) i d) Denis Bećirović rekao je da o određenim pitanjama i Komisija može raspravljati, a o nekim bi trebalo da raspravlja i Parlament, koja su tako važna.

Konkretno je predložio da Komisija predloži Kolegiju da materijale iz podtački a) i d) uvrsti u dnevni red sjednice Doma, koja će biti održana 10. 3. 2010.

Predsjedavajući Matić konstatirao je zaključak da Komisija predlaže Kolegiju Doma da se materijali iz podtački a) i d), odnosno **Zaključci Vijeća Evropske unije za opće i vanjske poslove (GAERC), od 7. i 8. decembra 2009. (informacija MVP-a, od 9.12.2009.), i sastanka Vijeća za vanjske poslove, Brisel, 25.1.2010., Zaključci Vijeća o BiH: Operacija ALTHEA (EUFOR), (informacija MVP-a, od 28.1.2010.)** uvrste u dnevni red jedne od sjednica Predstavničkog doma.

Ovaj zaključak usvojen je jednoglasno.

Slavko Matić na kraju se zahvalio članovima Komisije i u 13,45 sati zaključio sjednicu.

SEKRETAR KOMISIJE

PREDSJEDAVAJUĆI KOMISIJE

Merdžana Iglica

Slavko Matić

Dostavljeno:

- naslovu
- a/a